

D. O. M.
THESES
EX UNIVERSA MEDICINA
SELECTÆ



PUBLICIS AGITANDÆ DISPUTATIONIBUS
IN SCHOLIS MEDICORUM
ACADEMIÆ CADOMENSIS,
PRO DOCTORATUS GRADU, ET COOPTATIONIS
MUNERE CONSEQUENDO.

M. JOANNE FRANCISCO DE LA DUCQUERIE, Regis
Consiliario, & Professore Regio,
Præside.



CADOMI,
Ex Typis ANTONII CAVELIER, Regis & Academiæ
Typographi. M. DCCXV.

2

T H E S E S

EX UNIVERSA MEDICINA.

EX PHYSIOLOGIA.

MEDICINA à medendo sic dicta, ab Hippocrate optimè definitur *adjectio deficientium, & detractio redundantium.* Ars est; quæ sanum corpus conservat, ægrum restituit. Commodè satis dividitur in quinque partes. Varias inter Medicorum sectas tenebit is præstantiorem, qui experientiam rationi, rationem experientiæ consociare noverit. Peripateticorum elementa non admittimus. Cartesii supponi possunt, nec sine necessitate. Chymicorum ad duo revocamus, terram & phlegma. Ex his cum materiæ subtilis adminiculo cætera exurgunt principia, salia, sulphura, & spiritus, & in hæc resolvuntur. Quid sit temperamentum ad *pondus*, temperamentum ad *justitiam*, an detur utrumque? in his tempus non ludimus. An à verme, an ab ovo pendeat generationis opus, magna est controversia. Qui vermium tuentur opinionem, clarissimorum authorum experimentis freti, vermes in semine contineri asserunt. Nos ejusmodi corpusculorum motum ab impulsu particularum seminis subtiliorum non sine fundamento repetimus. Ab ovo igitur principium: & quidquid dicant qui contrarium sentiunt, in ovo muliebri partes nascituri animalis antequam semen recipiatur, delineatas esse multis argumentis evincere aggredimur: hæ partes sunt innumerorum tubulorum congeries. Omnes permeat aura seminalis, omnibus præbet elaterium, quo dato, ob resistantiam liquidæ intra tubulorum cava contenti oscillant. Ab oscillatione cæteræ pendent functiones, secretio, nutritio, accretio. Primam in ovo partium evolutionem à fermentatione quidam repetunt, sed quâ prorsus ratione. quibus argumentis innitantur, nescimus. Stupendum profectò naturæ miraculum vis est magnetica. Cujusvis sint indolis quæ è Magnete erumpunt corpuscula, attamen ad poros ferri permeandos, vel ad eos sibi accommodandos haud inepta esse certum est. Cur autem, ut in ovo idem absolvatur, à seminis subtilioribus particulis fermentationem advocas? cur ad motum fermentationis confusum & inordinatum recurris, ubi viget miranda series & perpetuus ordo? Dum particulae seminis subtiliores futuri animalis tubulos subeunt, viam parant materiæ, à qua pendet vis elastica:

hinc fibrarum elater; succi tunc inertes & immoti vibrantur, & alternis propelluntur; sic à solidis oritur motus, sic ab eorumdem actione perseverat. Fœtus in utero matris non respirat. Per os nutritur, non sanguine materno, sed humore in amnio contento, cui innatat. Grandior factus, si Drelincurtio credimus, propter maiorem meconii copiam calcitrat impatiens, & disruptis membranis egreditur: statim aër per trachæam arteriam pulmonum vesiculas subit, quas elatere suo dilatat, hinc respiratio. Aërem in inspiratione pulmonum vesiculas permeare, ne credas. Si in pulmonibus rubicundiores induat sanguis colorem, hunc trituræ acceptum referas oportet. Mammæ in gravidis fororiant propter communicationem nervos inter uterinos & mammarios positam. Lactis materia chylus est. Post partum magnâ copiâ deferitur ad mammas, impedito scilicet per uteri meatus succi nutritii proventu. Nutritionis pariter materia chylus. A tritu pendet *chylosis*. Pars chyli purior à crassiori secernitur in tenuibus intestinis ope motûs vermicularis fibrarum & lymphæ à glandulis abundè scaturientis; sed præcipuè bilis succique pancreatici simul concurrentium adminiculo, absque effervescentia & fermentatione. Fermentorum promptuarium & sedem glandulas arcemus ab œconomia animali. Inventæ à recentioribus, non detectæ sunt glandulæ; sine harum auxilio, sine fermentorum ope, sine diversarum configurationum mancipio peraguntur secretiones solâ simplicique mechanicâ. Eâdem prorsus ratione periodica sanguinis vacuatio scæminis contingit, non à fermento, non à luna, sed à peculiari vasorû dispositione. Omnia corporis vasa continua sunt. Venæ sunt arteriæ reflectæ: ex illarû curvaturis prodeunt vasa lymphatica, ductus excretorii, &c. Ab arteriarum curvaturis cerebri substantia corticosa, callosa, tandemque continuato filo nervi propagantur. In his succum nervosum percolari, abnuere vetat experimentum Malpighii, qui in cauda bovis, nervo compresso, humoris motum observavit: secto præterea eodem, terebinthinæ instar, fluxit glutinosus. Spiritus animales alii admittunt, alii negant: tu qui salis volatilis naturam illos refert contendis, dic, amabo, cur ex tota cerebri compage analysi chymicæ subiectâ, minor copia salis volatilis, quàm ex minima urinæ quantitate eliciatur? Tot stupendos aëris effectus vides. Constans & perpetuum est illius elaterium: illud cæteris corporibus imperit, fibris corporis humani non denegat. Talis opifex, si spiritus animalis nomine appelletur, non errabis. Musculi nec ab effervescentia sanguinis & spirituum animalium, nec à vesicularum sphaeroidium turgescencia contrahuntur: hoc enim & rationi, & experientiæ contrarium asserimus.

EX HYGIEINE.

HYGIEINE tuendæ sanitatis leges præscribit. Deteritur quotidie de substantia corporis; adjicit Hygieine parçâ quod satis est manu. Si plus concedas, quàm expedit, animal excessu perturbatum sexcentis obnoxium fit ægritudinibus. Adsit aurea mediocritas in eorum, quibus ad vitam in statu naturali conservandam nobis opus est, usurpatione. Medicus expositulanti tantum largiatur concinna, avertat incongrua, præscribat optima. Somnus & vigilia modum non excedant: secus enim illo vires torpescerent, hæc corpus debilitatum frangeretur. Otio languent corporis functiones, motu felicius peraguntur, fibræ validius oscillant; hinc excreta ritè amandantur. Motus semper quieti succedat. Aër, cibus & potus vitam foveat ac tueantur. Aër corpus est liquidum, grave, densari & resiliire aptum. Tantæ est ad vitam necessitatis, ut nullus eo impunè diu carere possit. A varia illius temperie, varia pendent multarum gentium temperamenta, varii mores, varia studia. Cur homo in eadem regione modò tristis & severus, modò hilaris, nunc prosperâ utatur valetudine, nunc adversâ, miraris? ab aëre reperti debet hæc varietas. Qui Lutetiam Parisiorum adeunt nostrates ferè omnes alvi fluxu torquentur. Cur aquas Sequanæ insontes accusas? Quidam vulgari famæ aurem præbentes aquam fontanam, vel cerevisiam, vel vinum purum hauriunt: quid inde? seriùs aliquando, sed tandem alvi fluxu miserè vexantur. Qui se pelago committunt, idem solvunt vestigale. Nonne ab aëris temperie diversâ & immutatâ isthæc contingit varietas? Aëris externi munus est pulmones intrare, eorum vesiculas dilatare & comprimere, sanguinis particulas disjungere, dividere, comminuerè, quò faciliùs vas excretorium moli suæ respondens subeant; hinc in expiratione multæ abripiuntur fuligines. Dum aër cæteras corporis partes ambit, fibrarum elaterem fovet, juvat oscillationem. Si cum solidis rectè æquilibretur, erunt motus æquabiles, optimè terentur succi, & vigebit sanitas. Vitetur aër, cui sæpissimè admiscuntur effluvia, quæ partium solidarum oscillationes perturbant, debitamque cum fluidis proportionem tollunt, alioquin causa esset multorum morborum non infrequens. Cibo & potu partes deperditæ restaurantur. Victu corpus nutriri, non saginari, vires refici, non opprimi debent. Edulia sumas, quæ stomacho amica sint, consueta, suaviora, quæ faciliè teri possint, non quæ fermentationi sint magis idonea. Optimum tibi sit condimentum fames. Liquores ardentes, qui nunc multorum deliciæ sunt, tanquam quid cane pejus & angue fugias. De vino nil dicimus: vivendo nimirum Medicè, vivitur interdum miserè; in omnibus tantum modum memento servare.

5
EX PATHOLOGIA.

PATHOLOGIA est ea Medicinæ pars, quæ circa morbos, eorumdem causas & symptomata versatur. Morbus est, quando solidæ & fluidæ corporis humani partes debitam inter se proportionem non servant. Quidquid hanc tollit, pro morbi causa habeto. In æquilibrio sanum corporis statum ne positum existimes. Ut adsit sanitas, destrui debet æquilibrium: cave tamen ne plus æquo destruat. Si enim, ubi partes tendunt ad æquilibrium, morbus est; sic, cum ab eo nimis recedunt, pessimè se habet corpus. In medio igitur stare debet proportio illa solidas inter & fluidas partes, ut corpus vigeat incolume. Tritus & fermentorum assertoribus paradoxa forsan videbitur hæc opinio: sed qui veritatis potius, quam systematum amore capitur, rebus accuratè perpensis, solidorum & fluidorum vires æquas non esse comperiet. Succī fluxiles, ductiles, à solidis facillè debent superari, subigi, & ad sua quæque munia obeunda debite propellis: tunc adest sanitas. Morbus verò ingruit, si iisdem succis superandis vel imparia sint solida, vel quacumque de causa illos nimis superent: in hoc plus æquo destruitur æquilibrium, in illo partes ad idem nimis tendunt. His positis, morbos omnes à nimia fibrarum vel laxitate, vel tensione aut crispatura oriri contendimus. Singula, quæ fibras vel laxant nimis, vel rendunt aut crispant, puta causas morborum procatarticas. Ut fibræ oscillent, debent fluidis irrigari; si irrigatio nimia sit, laxatur fibra, minuitur elaterium, hinc motus debilis & languidus. Hoc fonte derivantur omnes ferè morbi chronici. Si ob coagulatos, aut quocumque modo vitiatos succos fibræ nimis tendantur aut crispentur, nascuntur acuti. Nunc quid sit fibræ laxatio, aut ejusdem crispatura, audias. Tibi sit fibra velut fides cujusvis instrumenti: hanc si diutius aquâ perfundas, nonne fides laxabitur? nonne remittetur elater? rationem quæris? aqua fidis poros vel nimis referat, vel si cum D. Mariotte aërem in liquoribus dissolvi contendis, à liquore fibrillarum poros subeunte dissolventur illæ aëris particule, à quibus pendet corporum elater. Fit *erethismus*, cum corpus aliquod ita in fibrillarum poros incidit, ut æther per illas continuè effluens iniquiores reperiat meatus. Tunc tremulum & inordinatum in fibrillis motum excitat, unde irritatio. Porro cum in massa sanguinea multi sint sales acres, si qui redundant, talem facient in fibrillis impressionem, quæ aëris præterfluentis motum perturbabit. Alia est causa irritationis solidorum, cum scilicet fibræ à succo quodam crasso & coagulato distenduntur: tunc enim à centro æquilibrii plus æquo dimotæ, crebriores ut sese restituant, patiuntur.

tur oscillationes, præsertim si in humore inspissato manifesti sint sales acres; tunc enim oriuntur inflammationes, tumores, motus convulsiui, deliria, erosiones, exanthemata, carbunculi, pustulæ, bubones, phlyctenæ, variolæ. In massa sanguinea quicquid obrudat fermentator, ne mica quidem est acidi: id testatur Chymia: sed multi sunt sales acres, unde ingens morborum cohors. In febribus intermittentibus omnes acidum incusant. Reverà pars quædam chylosa, malè trita in tortuosis, iisque tenuissimis mésentèrii canalibus forsitan stagnabit; hinc à tritûs defectu prima mali labes. Sed si acida in febribus tantùm retundere contendis per sales alkalinos, Helmontianorum more, viden' quot turbas concites? pejora prioribus excitabis incommoda, & diri exurgent effectus. Tu qui Medici nomen usurpas, naturam paulò accuratius intuerè: videbis sanguinem in febricitante salibus alkalicis turgere magis, quàm cùm benè se habet. Sed kina kina morbos tollit salium alkalinarum more acida absorbendo: minimè. Cortex ille non abundat salibus alkalicis: imò acidorum more, succum *heliotropii* aquæ mixtum rubro colore inficit. Nonne etiam acidorum ope, v. g. succo limoniorum, vel omphacio in frigoris *paroxysmo* exhibitis multas febres debellatas videmus? Rationem quarunt Medici, & quocunque se vertant modo, causam extricare non possunt. Nos illam digito monstraremus nostris semper innixi principiis: sed tot peritissimorum Virorum iudicio illam subicere non est opportunum, nisi quasdam antea observationes recoquere nobis licuerit accuratius.

EX SEMELOTICE.

SEMELOTICE versatur circa morborum signa. Illa sunt vel *prognostica*, quæ futurum morbum præfagiunt; vel *diagnostica*, quæ morbi statum præsentem declarant. Hæc rursus dividuntur in symptomatica, quæ morbum sequuntur; critica, quæ naturæ quodam impetu accidunt. Crîsis vitam aut mortem prænunciat. Oritur à fibrarum debita oscillatione restituta: ut enim succi in partibus stagnantes foràs propelli possint, *isochronæ* debent esse fibrarum oscillationes. Si inter se non consentiant, sed opponantur, tunc ingravescit morbus: quòd si tamen post multas vibrationes consentiant, nimiam fluidorum resistentiam superare poterunt, & eorum particulas ita comminuere, ut facilè per canales excretorios propelli possit humor vitiosus: hinc in diebus criticis non rarò contingunt evacuationes, quas ab humorum concoctione seu *παρασκευῇ* oriri ferè credunt omnes. In iisdem criticis diebus mors nonnunquam

accidit, cū humor depravatus & stagnans nec subigi, nec satis attenuari potuit: tunc enim densius intra canales inspissatur, fibræ nimium distenduntur, & ad talem superandam resistentiam ineptæ fiunt: quæ antea vividiores erant oscillationes vix percipiuntur, languent: jamjam ad æquilibrium cū fluidis partibus tendunt solidæ, & mors adest in propinquo. Alia sunt morborum signa, nempe pulsus, urina, fæces. Variæ sunt pulsus differentiæ, vel enim sunt magni & validi, parvi aut debiles, &c. Tot pulsuum diversitates enumeravit Galenus, ut vix observari possint. Ex validiori vel debiliore cordis & arteriarum contractione pendent pulsus aut debiliores, aut celeriores. Immoderatæ sanguinis effervescentiæ aut fermentationi pulsus celeritatem non semper tribuas: quod enim tardius fluit sanguis per vasa, eò crebriores redeunt & cordis & arteriarum oscillationes. Urinarum color potissimum spectari debet. Non inania sunt verba *nubis*, *enceorematis*, & *ὑποχολέρας*: pro horum majori vel minori copia quædam aliquando prognosis institui potest; ne tamen ex *ὑπερχολέρας* morborum causas omnes, variaque symptomata assecuturum more circulatorum confidas. Ex excrementorum colore & consistentia, an alimenta rectè in ventriculo contrita, an mediantibus bile & succo pancreatico benè subacta in intestinis, num vitio bilis; succi pancreatici aut lymphæ intestinalis morbus procedat, cognosces? Ad sexum, ætatem, vitæ genus, loca, tempora, ad ægri etiam oculos, vultum, linguam, cutem. Medicus suæ studiosus artis & famæ non leviter debet attendere.

EX THERAPEUTICE.

THERAPEUTICE medendi rationem præscribit. Tres aliæ partes huic famulantur, nempe *Dieta*, quæ rerum non naturalium usum moderatur; *Pharmacia*, quæ remedia præparat; *Chirurgia*, quæ ferro mædetur. Summum Artis Medicæ præsidium venæ sectio; quæ cæterarum evacuationum vices supplet. Hujus ope canalibus ultra metas distentis tonus restituitur, debita redeunt oscillationes, promoveretur succorum tritus, & humores in corpore redundantes evacuantur. Quàm necessaria sit ineuntibus morbis hæc medendi ratio, ex sanguinis eruptione per disrupta vasa tardius ut plurimum cognoscunt venæ sectionis osiores. Prudentem tamen requirit Medicum venæ sectio; sanguinis enim editio copiosior pejora aliquando prioribus excitat symptomata, virium prostrationem, secretionum imminutionem, succi nervosi penuriam, unde pulsus intermissio, *lipothymia*, & *syncope*. Remedia, quæ Pharmacia

suppeditat, ex mineralium, vegetantium, & animalium familia eruuntur. Dividi vulgè solent in alterantia & evacuantia. Prima, ut aiunt, humorum qualitates immutant, & ad statum naturalem reducunt: altera redundantium evacuationem promonent. Triplex est evacuatio; una per superiores partes, altera per inferiores, tertia demùm per totum corporis ambitum. Quæ per superiores vacuant medicamenta, *emetica, expectorantia, errhina, salivantia*; quæ per inferiores, *purgantia, diuretica, menses vel hæmorrhoides moventia*; quæ per corporis habitum, *diaphoretica vel sudorifica* dicuntur. Hæc & illa stimulando agunt. Purgantia, ventriculi & intestinorum membranas irritant, convellunt; hinc humores viscerum istorum parietibus & cellulis inhaerentes excutuntur, & succi exprimuntur è glandulis. *Emetica* non solum ventriculi membranas irritant, sed etiam in contractionem adducunt *diaphragma* & musculos abdominis: hinc unica *stibii* atomus tot & tam copiosas sæpè concitat vacuationes. Salivantia, diuretica, sudorifera, cæteraque id genus evacuantia stimulando suum pariter effectum habent. Adest stimulus, cum pars aliqua ita in fibrillarum poros impingit, ut illarum vibrationes augeat, crebrioresque efficiat. Hæc præstant omnia ferè medicamenta: particulis enim constant, quæ cuneorum instar fibris inhaerent, & easdem stimulant; vel si cum cæteris humani corporis liquoribus intimiùs permisceantur, sic illos aut acredine suâ afficiunt, ut quas alluunt solidas partes, vividius vellicent; aut ita in corporis succos inducuntur, ut eos temperent, fibrarumque tollant *erethismum*, quod ultimum præstant alterantia. Hinc in cura morborum omnium spectari præsertim debet solidorum motus, à quo cum debita proportionem permanente si vita pendeat & sanitas, sic ab eodem perturbato morbus ingruit, restituto sanitas viget.

Hæc suas Theses proponebat CAROLUS MALOUIN, Cadomæus;

Licentiatuſ Medicus, die Veneris quartâ Octobris,

A. R. S. H. M. DCCXV. ab hora octava ad meridiem.

Fortuitam deinde Aphorismi Hippocratis sorte ducti explicationem habebit

PRO AGGREGATIONE OBTINENDA.